

RAJOELINA TANY ETAZONIA

Nandainga indray fa tsy tafiditra amin'ny MCC izany isika

Araka ny vaovao voaray, nandainga indray ny filoha Rajoelina avy any Etazonia, tsy anisan'ireo firenena Afrikana tafiditra hisitraka ny MCC, na Millenium Challenge Corporation, fiaraha-miasa amin'ny Amerikana i Madagasikara. Ny firenena hahazo izany MCC izany dia i Gambia, Togo, Senegal ary Mauritania. Arak'izany, tsy misy Madagasikara hahazo tetikasa hiarahana amin'izy ireo. Fa mahakasika izay fiaraha-miasan'ny Amerikana amin'i Afrika izay, nihaona tamina filoham-pirenena afrikanina 6 ny Filoha Biden hampanjakana ny fifidianana malalaka sy madio ary mangarahara. Ny Filoha Biden dia nihaona tamin'ny Filoham-pirenen'ny Repoblika Demokratikan'i Congo (RDC) Felix Tshisekedi, ny Filoham-pirenen'i Gabon Ali Bongo Ondimba, ny Filoham-pirenen'i Liberia George Manneh Weah, ny Filoham-pirenena Malagasy Andry Rajoelina sy ny Filoham-pirenena Nizeriana Muhammadu Buhari ary ny Filoham-pirenen'i Sierra Leone ny herinandro lasa teo. Niresaka momba ny fifidianana hatrehin'ireo firenena ireo amin'ny taona 2023 ny Filoha Biden, amin'izao fotoana manan-danja ho an'ny demokrasia maneran-tany izao. Niresaka momba ny fifidianana manasaka fe-potoam-pitondrana farany teo ihany koa ny Filoha Biden ary nanambara, fa nohamafisin'izany dingana izany ny tanjaky ny fahaiza-miatry ny demokrasia amerikana. Nohamafisiny ihany koa ny fahavononan'ny Fitondrana Biden-Harris hiara-hiasa hanavaozana sy hiarovana ny demokrasia eto an-toerana sy any ivelany. Na dia tsy ampy hamaritana ny demokrasia aza ny fifidianana fotsiny, dia nanantitrantitra ny Filoha Biden, fa tena ilaina ny fanaovana fifidianana amin'ny fampandehanana ny demokrasia.

Niara-nidinika ny fanamby amin'ny fanatanterahana fifidianana sy ny fampiasana ny zo hifidy ireo filoham-



Ny fihanan'ny filoha Amerikana tamina filoha maromaro avy aty Afrika, anisan'izany ny filoha Malagasy.

pirenena ireo, anisan'izany ny fitsabahan'ny vahiny sy ny herisetra ara-politika. Nifanakalo izao fomba fanao nahomby, amin'ny fitantanana ireo ambana ireo sy hiantohana fifidianana azo antoka sy mangarahara ary atokisan'ny vahoaka ihany koa ireo filoha. Nohamafisin'ireo mpandray anjara ny fahavononan'izy ireo hikarakara fifidianana malalaka sy marina ary mangarahara, tanterahan'ny rafi-pifidianana nasionaly mahefa sy mahaleo tena ary tsy mitanila, araka ny voalazan'ny sata afrikana momba ny demokrasia sy ny fifidianana ary ny fahaiza-mitantana. Manan-danja ny fifidianana hatao aty Afrika amin'ny taona 2023. Na dia tsy manohana kandida na antoko manokana aza i Etazonia, dia manamafy ny fanohanany ny zotram-pifidianana hanamafisana ny demokrasia aty Afrika. I Etazonia dia miara-miasa amin'ny Kongresy ary mikasa hanome 165 tapitrisa dolara mahery, hanohanana ny fifidianana sy ny fitondrana tsara tantana aty Afrika amin'ny taona 2023.

Ny Valosoa

Antoko TIM

Manentana ireo mpikatroka hiditra amin'ny lisi-pifidianana

Nanatanteraka fivoriana ny avy amin'ny antoko Tiako i Madagasikara (TIM) any Ihosy faritr'Ihorombe ny faran'ny herinandro teo. Nisy arak'izany ny fanentanana ireo mpikambana hanatant-raka ny toromariky ny filoha Marc Ravalomanana, nandritra ny fankalazana ny tsingerintaona nahaterahany sy ny faha-20 taonan'ny antoko TIM, natao tany Fianarantsoa ny 12 desambra lasa teo. Manentana ny mpikatroka rehetra hiditra amin'ny lisi-pifidianana ny TIM Ihosy, ary nanentana azy ireo ny mpitarika ho mailo amin'ny fanaraha-maso



Ny fivorian'ireo mpitarika ny antoko TIM tany Ihosy faritra Ihorombe.

izany lisi-pifidianana izany, ialana amin'ny karazana hosoka isan-karazany amin'izany hosoka izany. Nilaza ihany koa izy ireo, fa vonona hametraka

ny paikady rehetra hame-renana ny filoha Marc Ravalomanana eo amin'ny fitondrana indray, amin'ny fifidianana filohampire-nena ho avy eo. Manana

ny anjara toerany ihany koa ity antoko najoron'i Dada ity, any amin'ny renivohitry ny faritra Ihorombe iny.

Stefa

Raharaha Andry Biahary

Henjana ny tady eo amin'ny zanak'i Toliara sy ny fitondrana

Henjana ny tady amin'izao fotoana eo amin'ny Zanak'i Toliara sy ny fitondrana, mahakasika ny nisamborana an'i Andry Biahary, mpandraharaha ara-toekarena any amin'ny faritra Atsimo Andrefana iny, nisy nisambotra ny faran'ny herinandro teo. Noho izay antony izay, nanome 48 ora ho an'ny mpitondra ao Toliara ireo Ray aman-dreny avy amin'ny foko Tanalana sy Mpitankazomanga, mba hamerenana an'ity Andriamatoa Andry Biahary ity any Toliara. Nosamborin'ny zandary ny alakamisy alina lasa



Ny hetsika ny faran'ny herinandro teo tany Toliara, ho fanohanana an'i Andry Biahary.

teo izy, izay mpaneho hevitra sy mpisintona lakolosy amin'ny facebook ary tsy misalasalala milaza ny tsy mety, sy ny tsy rariny

mitranga eo anivon'ny fiarahamonina. Nandeha ny resaka taorian'ny fisamborana azy, fa nentina tamin'ny fiara nizotra ta-

min'ny lalam-pirenena faha-7 (RN7), niala tao Toliara izy, saingy tsy fantatra mazava hoe nentina aiza marina ? Araka ny vaovao voaray farany dia voalaza fa nentina tany amin'ny fonjan'Ankazondrano Fianarantsoa, faritra Matsiatra Ambony ity mpisintona lakolosy ity. Tapitra omaly ny 48 ora nomen'ireo ray aman-dreny any amin'ny renivohitry ny faritra Atsimo Andrefana, mafampana ny toe-draharaha amin'izao fotoana. Harahantsika eto ihany ny mety ho tohiny.

Stefa

Ny Valosoa sy fakafaka

Tsy menatra ny mandainga ny mpitondra eto amintsika

10 volana sisa raha ny tetiandrom-pifidianana dia hiala eo amin'ny fitondrana ny mpitondra ankehitriny, izay nilokaloka fa hitondra an'i Madagasikara ho any amin'ny ho avy mamirapiratra . Hisy araka izany ny fifidianana indray, izay hitondra ny tany sy ny fanjakana amin'io taona 2023 io . Hatreto aloha, raha ny teny miloaka ny vavan'ny mpitondra dia manantena ity fitondrana TGV ity, fa mbola hanohy ny fitondrana ny firenena izy ireo raha ny zavatra hita etsy sy eroa. Nisy ny fampanantenana araka ny nambara tetsy ambony, izay lasa tohizan'i Andry Rajoelina indray hoe io asa io dia ho vita any amin'ny 2025, sns... Ny nifanarahana taminy anefa araka ny fanambarany dia ny hoe: ho vitaintsika ao anatin'ny 5 taona ireo tsy vitan'ny mpitondra teo aloha nandritra ny 60 taona. Marobe ny fampanantenana tao anatin'ny velirano 13 , kanjo mivadika zavatra hafa tato aoriana, fa tsy araka izay nampanantenaina 4 taona aty aoriana . Fa ny tena mibaribary dia ny fampanantenana teo aloha tsy vita , ny aty aoriana asesika ihany . Mody raisina kely ireny fampanantenana ireny raha vao mitabataba ny ao amin'ny tambazotran-tserasera dia hetsehina kely ilazana fa hoe manao ilay asa ny mpitondra . Ny bus miisa 1000 izay hoe hafarana hampiasaina eto Antananarivo Renivohitra dia tena tsy menatra ny mandainga ny mpitondra tenin'ny Prezidansa Ramatoa Lova Ranonomaro milaza fa tsy izy sy i Andry Rajoelina, no nampanantena ireo Bus ireo , nefa izy tenany mihintsy no nilaza izany nandritra ny valandresaka nataony ho an'ny mpanao gazety . Ny vahoaka aloha efa tonga saina, ka tsy manaiky ny lainga tsara lahatra intsony e ! Soa fa efa misy ny tekonolojia vaovao ahafahana mijery ny zavatra nambara tamin'ny propavandy, ka ireny ihany no ampahatsiahivina amin'ny mpitondra ankehitriny, izay efa misy mametraka mihintsy hoe Rainilainga.

Helisoa

TONONKALO

Mihetsika ny gasy leo

Mihamitombo hatrany hatrany ireo mijoro ho gasy leo, Mikendry hanambatra ny heriny ary dia mampiaka-peo. Manaitra ireo matoritory mba hihetsika, hifoha, Fa mila ovana ny mpitondra, indrindra indrindra ny filoha !

Fambara maro no mitranga, mihamafy ny tsikera. Anisany ny zava-nisy tao anaty Antenimiera. Fitsipaham-pitokisana efa an-dalam-pandaniana, No nitsefotra indray ka nahagaga, nahavariana !

Misy tombontsoa voakitika, misy seza mihozongozona, Ka mandeha ny tsindritsindry sy fanaovan-taingim-bozona. Indro idiran'ny filoha ireo tsy tokony hotsabahiny, Ka manjary manapentina ny laza sy ny voninahiny !

Efa mba natokana izy ho amin'ny toerana eny ambony: Mba ho rain'ny Malagasy fa tsy an'antoko intsony. Efa izay no nametrahana, efa izay no iavahany, Kanjo idirany ny antoko, dia mitohy ny fitsabahany !

Tsisy zavatra manjary ny ao anaty fitantanana. Maika ho tena loza izany mialoha ny fifidianana. `Zao dia efa mifanditra ny ao anaty fitondrana. Lasa ny mpanatanteraka no mitady hanao lalana !

Ny fiainam-pirenena zary toa misavoritaka. Ny mpitondra tsy mitsahatra ny mandainga sy mamitaka. Asa iretsy "gasy leo" raha hahavita hampiray, Ka hampiteny hoe "ry filoha, miala ianao fa ampy izay !"